

Inissianik attartortut piffissaq eqqorlugu akiliuteqartartut siunissami attartortunut akiliineq ajortunut akiliussisarnerannik aningaasartuutinullu taakku akilinngisaannik akiliisarnerannik pisussaaffeerullugit, inissianik akiliutit aalajangersarneqartarnerat pillugu maleruagassanut atuuttunut Naalakkersuisut allannguutissaannik siunnersuusiornissaat pillugu Inatsisartuni aalajangiiffigisassatut siunnersuut.
(Inatsisartuni ilaasortat, Siumut)

Akissuteqaat

(Ineqarnermut Naalakkersuisoq)

Aappassaanneerpeqarnera

Inatsisartuni Siumumit ilaasortat Naalakkersuisut ineqarnermut akiliutit aalajangerneqartarnerannut maleruagassanut atuuttunut allannguutissamik siunnersuuteqaqqullugit peqquneqarnissaannut Inatsisartuni aalajangiiffigisassatut siunnersuummik saqqummiussaqaqput. Attartortut piffissaq eqqorlugu akiliisartut attartortut akiliineq ajortut akiligassaannut akiliisarunnaartinneqarnissaat kissaatigineqarpoq.

Inatsisartuni Siumumit ilaasortat siunnersuutertik imatut tunngavilersorpaat, issuaaneq aallartippoq: *"Inissiami ineqartuit, inigisannullu pisussaaffiit naapertorlugu akiliisarlutit, taava ullumikkut ineqarnermut akiliuteqartarnerup aalajangersarneqartarnera pillugu maleruagassat naapertorlugit assersuutigalugu najugaqarfimmi najugaqarfigisanni najugaqartut allat piffissaq eqqorlugu ineqarnermut akiliisimangippata, najugaqarfinniluunniit inissiaq attartugassaq piffissami sivikinnerusumi sivisunerusumiluunniit inoqarsimangippat, ineqarnermut annertunermik akiliinissannut piumaffigineqassaatiit."*, issuaaneq naavoq.

Issuarneqartut eqqorluinnarput. Najugaqarfiit ataasiakkaat aningaasaqarnikkut matoqqasumik kaaviiarfiupput, taamaattumillu attartortut ineqarnermut akiliutitik aqutugalugit aningaasartuutitut tamarmiusunut nammaqatigiittarput. Tamanna inuunermi pissutsit nammaqatigiilluni pisussaaffeqarfiusut aammalu nammaqatigiilluni akiliiffiusartut allat assigilluinnarpaat. Akileraariaatsitsinni nammaqatigiinneq taannarpiaq tunngavigaarput, tassalu inuiaqatigiinni pissarsiassat qanorluunniit ikkaluarpata, kikkut tamarmik inuiaqatigiit karsiannut akileqataasarput.

Aamma siunnersuut pisortanut aningaasaqarnikkut allaffissornikkullu sunniuteqartussaasoq siunnersuuteqartut namminneerlutik saqqummiuppaat. Tassalu siunnersuuteqartut allapput, issuaaneq aallartippoq: *"Attartortut piffissaq eqqorlugu akiliisarnerinik pisortat attartortitsisutut qulakkeerinninngikkunik imaluunniit pisortat inaataannik allaffissornikkut aqutsinermik pitsannorsaannngikkunik, pisortat aningaasatigut eqqugaasinnaapput. Pisortat inissianik attartornermut akiliutit akilersinniarnernut allaffissornikkut aqutsinermik patajaallisarnissaannut piumaffigineqarsinnaapput, soorluttaaq inissiat inoqaratik uninngaannarnissaat pinaveersaartinniarlugu inissiat atornerqarnerat qulakkeerineqassasoq pisortat piumaffigineqarsinnaasut."*, issuaaneq naavoq.

Naalakkersuisut issuaaneq una uteqqikkusuppaat: pisortat attartortitsisutut aningaasatigut eqqugaasinnaapput. Tassalu attartortoq ineqarnermut akiligassaminut akiliinngippat, pisortat

inissianik piginnittut aningaasatigut eqqugaassapput! Tamatumunnga atatillugu erseqqissaatigineqassaaq, ineqarnermut akiliutit akilerneqartut najugaqarfiit akiligassanut pisussaaffinnullu akiliisinaanissaannut atorneqartarmata. Taamaattumik ineqarnermut akiliutissanit annaasat akiliinngitsoornerillu najugaqarfiit ilaannut sunniuteqartarput, taamaalillunilu najugaqarfinni pissutsinik aallartitsinngitsoortoqarsinnaavoq akiliinngitsoortoqarsinnaallunilu.

Siunnersuut malillugu siunissami pisortat inissianik piginnittut ineqarnermut akiligassat akilinngitsuukkat matussusertartussaavaat. Taamaattumik Naalakkersuisut apererusupput, aningaasat taakku suminngaanniit pisortanit pissarsiarineqartassappat?

Ajoraluartumik akissutissaq ataasiinnaavoq. Aningaasat akileraarutit qaffannerisigut tamatsinneertariaqarput.

Inatsisartuni Siumumit ilaasortat siunnersuutaat Sanaartornermut Ataatsimiititaliamit suliarineqarpoq, taannalu isumaliutissiissummik suliarilluagaasorujussuarmik saqqummiussivoq, tamannalu Naalakkersuisuniit qujassutigaarput. Sanaartornermut Ataatsimiititaliap sammisami aaqqiissutissat periarfissat arlallit aamma tikkuarneqarput, ilaatigullu pisortat inissiaataasa attartortittakkat tamarmiusut akornanni nuna tamakkerlugu nalimmassaasarnissaq imaluunniit isumaginninnermi ikiorsiissutit qaffannerisigut aaqqiissuteqarnissaq tikkuarneqarput.

Ataatsimiititaliap isumaliutissiissutaani allassimavoq, issuaaneq aallartippoq: ” *Siunnersuutip aningaasaqarnikkut annertussusaa ilisimatinnagu aamma ataatsimut iluarsartuusseqqinnissamut pissutsit allat siunnersuutillu ataqatigiinnerat ilisimatinnagit, aalajangiiffigisassatut siunnersuutip akuerinissaanut inassuteqarnissaq Ataatsimiititaliap tunngaviatigut eqqarsarnartoqartippaa. Siunnersuutip akuereratarnissaanut sunniutissat erseqqissaatiginissaannut Ataatsimiititaliap Naalakkersuisunut apeqqutit arlallit nassiussimavat.* ”, issuaaneq naavoq.

Siunnersuutip aningaasaqarnikkut sunniutissai ilisimareernagit, aalajangiiffigisassatut siunnersuut akuerisassanngorlugu innersuunneqarmat tunngaviumik isumaliornartoqartoq pillugu ataatsimiititaliap isummorsorneranut Naalakkersuisut tamakkiisumik tapersiipput. Siunnersuutip aningaasaqarnikkut sunniutissarpiai kingunissaalu suli ersernerlupput, kisiannili ajornerpaamik pisoqassappat, attartortut maanna najugaqarfinnut akiitsuinut akilinngitsuukkanut matussutissatut pisortat 100 mio. koruunit sinnerlugit pissarsiariniartariaqassavaat.

Sooq akilinngitsuukkanik akiitsoqartoqarnersoq pimoorussamik tunngaviumillu misissuisoqartariaqartoq Naalakkersuisut isumaqarput. Attartortut akiliinissamut piomassuseqartut ineqarnermut akiligassaminnik akiliinngitsoortarsimanissaat Naalakkersuisunit ilimagineqanngilaq. Taamaattumik sooq attartortut ataasiakkaat ineqarnermut akiligassaminnik akiliinngitsoortarsimanersut aammalu akilinngitsuukkaminnik akiitsoqalartarsimanersut misissorneqarnissaa pingaaruteqartorujussuavoq. Tamanna ajornartorsiuq qiteraa, tamannalu misissorneqartariaqarpoq aaqqinneqartariaqarlunilu.

Naggasiutigalugu Naalakkersuisut maluginiarpaat, ataatsimiititaliaq isumaqatigiisooq allannguutissamik siunnersuummik imaattumik saqqummiussaartoq: Issuaaneq aallartippoq: ” *Ineqarnermut akiliutit aalajangerneqartarnerat pillugu malittarisassat atuuttut allanngortinneqarnissaannut siunnersuummik Naalakkersuisut saqqummiussinissamut peqquneqarnissaannik Inatsisartut aalajangiiffigisassaattut siunnersuut, taamaalilluni ineqarnermi akiliinngitsoornermut atatillugu ininut namminersorluni attartortittakkanut*

periuseq inatsiseqarnerlu assigalugu pisortat attartortitsisut siunissami annaasaqaataasinnaasunik isumaginnittassallutik.”, issuaaneq naavoq.

Sooq attartortut ilaat ineqarnermut akiligassaminnut akiliinngitsoortarsimanersut pillugu apequt Naalackersuisut siunissami suliariniarpaat, taamaalillunilu attartortut akiliineq ajornerusut ajornartorsiutaanerat qanoq iliorluni pinngitsoorneqarsinnaanersut ikilisinneqarnerisulluunniit paasinarneqassalluni. Tamanna Sanaartornermut Ataatsimiititaliap isumaliutissiissummini ilanngussanik ilaqartitaminni suliarilluagaasorujussuarmi isummersuutaannut naapertuulluinnartutut Naalackersuisut isigaat.

Isumaliutissiissummi Ataatsimiititaliap ujartorpaa ineqarnermut tunngasut pillugit iluarsartuuseqqinneqarnerup isumagineqarnissaanut piffissalersuilluni pilersaarut. Tassunga atatillugu Naalackersuisut ilisimatitsissutigissavaat, 2014 tassaammat ukioq ineqarnermut tunngasunik misissueqqissaarfiusoq aamma naatsorsuutigineqarpoq 2015-ip ingerlanerani iluarsartuussinermut atasumik inatsisunut tunngasunik suliaassanik Inatsisartunut saqqummiussisoqassasoq.

Taamatut oqaaseqarlunga siunnersuut Inatsisartuni suliarisassanngorlugu innersuuppara.